

22 JANUARI 2018

Kempunan bergelar token dadah

14 NEGARA

KOSMO! ISNIN 22 JANUARI 2018

Polis rampas wang tunai RM40,000 dipercayai dijadikan modal perniagaan

Kempunan bergelar token dadah

Oleh YATIMIN ABDULLAH

PASIR MAS – Hajat seorang penganggur untuk meraih pendapatan lumayan dengan menjadi token dadah tidak kesampaian apabila dia dicekup dalam serbuan di sebuah rumah di Kampung Gual Tok Deh Barat, Rantau Panjang pada Khamis lalu.

Dalam operasi kira-kira pukul 5 pagi itu, suspek yang berusia 31 tahun ditahan bersama wang modal berjumlah RM40,000 hasil jualan ubat batuk dan pengedaran dadah.

Ketua Polis Daerah Pasir Mas, Asisten Komisioner Abdullah Mohammad Piah berkata, pemeriksaan di dalam rumah tersebut turut menemui dan merampas tiga gram heroin, 305 botol ubat batuk dan 30 milimeter cecair ketum bernilai RM3,750.

“Wang tunai berjumlah RM40,000 yang ditemui itu dipercayai merupakan wang hasil jualan dadah sejak lima bulan lalu.

“Hasil siasatan lanjut mendapati wang tersebut ingin dijadikan sebagai modal untuk mengembangkan kegiatan pengedaran

dadah di sekitar kawasan itu,” katanya pada sidang akhbar di sini semalam.

Abdullah berkata, sarung ujian air kencing yang dilakukan ke atas penganggur itu mendapati dia positif dadah jenis methamphetamine.

Jelasnya, pemeriksaan lanjut juga menunjukkan dia mempunyai tiga rekod jenayah lampau berkait dengan dadah dan sudah lima bulan menjalankan kegiatan haram itu.

Kes disiasat di bawah Seksyen 39A(1) dan Seksyen 12(2) Akta Dadah Berbahaya 1952.



ABDULLAH (dua kiri) menunjukkan dadah dan wang tunai yang dirampas dalam serbuan di rumah seorang penganggur pada sidang akhbar di Pasir Mas semalam.